

11018

地 30
539

廣東省海陽縣鄉土志全

光緒三十四年歲次戊申季夏之月編

海陽縣鄉土志

海陽翁輝東
黃人雄
合纂

編輯要旨

- (甲) 本篇悉遵 憲定例目，將本境所有往事近事，詳細分門列入。
- (乙) 本篇分歷史地理二門，物產載在地理之內。
- (丙) 本篇共分為十四章，每章各繫以若干節，使各有統屬，不致紊亂。
- (丁) 本篇所輯，俱搜本境事迹，或 憲定成例，雖舉其端，而本境無其事者，均不敢載入。

海陽縣鄉土志篇目

歷史

第一章 沿革

第一節 建置年代

第二節 建置以前

第三節 建置以後

第二章 政績錄

第一節 興利

第二節 去害

第三節 聽訟

第三章 兵事錄

第一節 全在本境

第二節 涉入本境

第四章 耆舊錄

第一節 事業

第二節 學問

第五章 人類

第一節 漢族

附理學名賢祠 名宦祠 鄉賢祠 忠義孝弟祠

節 孝祠

第二節 徭族

第六章 戶口

第七章 宗教

第八章 實業

地理

第一章 位置

第一節 疆界

第二節 區分

第三節 古蹟

第二章 山脉

第三章 水道

第一節 流域

第一節 發源

第四章 道路

第一節 驛路

第二節 鐵路

第五章 物產

第一節 天然

第二節 製造

第六章 商務



海陽縣鄉土志

歷史

第一章 本境沿革

第一節 建置年代

晉成帝咸和六年，析揭陽縣地置海陽縣，屬東官郡。安帝義熙九年，析東官置義安郡，海陽縣屬焉。

第二節 建置以前

唐虞，屬南交地。

三代，屬揚州之南裔。

謹案周初海陽之名，已見於逸周書王會篇。

春秋，屬吳之南裔。

戰國，屬楚之南裔。

秦，南海郡之揭陽縣。

漢，南海郡之揭陽縣。

謹案前漢書地理志，祇有揭陽，無海陽。攷漢初搖毋餘封海陽侯，而史記索隱曰：海陽南越縣，海陽之名，疑嘗再見。

三國，南海郡之揭陽縣。

第三節 建置以後



宋義安郡之海陽縣

齊義安郡之海陽縣

梁東揚州之海陽縣又屬瀛州

陳義安郡之海陽縣

隋開皇九年潮州之海陽縣大業三年仍屬義安郡

唐天寶間屬潮陽郡

五代潮州之海陽縣

宋潮州之海陽縣

元潮州路之海陽縣

明潮州府之海陽縣

本朝潮州府之海陽縣

第二章 政績錄

第一節 興利

宋元符中陳坦任海陽縣事多善政時邑學附府學西偏坦捐俸重建於府治之左

謹案陳坦福建晉江人任海陽秩滿占籍海陽支裔蕃衍秩溪陳姓皆其後云

紹興間趙師睿任邑令築溪東隄寶慶間王衡翁任修南桂都隄紹定間黃申孫任邑主簿修水南隄

元至大間趙良塘任邑尹修隄以衛田廬民感德之至治間張明

德任邑主簿修梅溪隄

明宏治中徐弼知縣事修復陷隄以興水利金謚亦於宏治時知縣事時北門隄水漲崩潰三陽(海陽潮陽揭陽三縣)廬墓全行淹沒謚捐俸修築贊石立基二百年來民免其魚厥功實鉅

嘉靖間陳察補海陽都教諭以學地卑窪議市民地高其基建尊經閣未成遷秩去十二年巡撫南贛復捐金成之先是宣德五年袁均哲任海陽教諭興學校講禮讓文士化之其後司邑鐸者教諭凌霓萬歷間任增學田易維時天啓間任倡修文廟馮劬姑蘇人隆慶間知縣事與陳察同郡察既捐俸建邑學尊經

閣笏至益增修之每謁廟與諸生親授經旨迪以躬行孝弟羣士講習勃然有興與兄伍芝并以循吏名時人目之為大馮君小馮君云

沈鳳起吳江人萬厯間知縣事時東津沙街隄潰東廂秋溪(屬海陽)隆眼城(屬饒平)蘇灣(屬澄海)諸都禾沒殆盡鳳起甫下車乃建議中砌地龍以杜滲洩外培荒石以禦衝激又以上流加石磯以障水勢當事違其議逾月隄成四都民利賴之

金一鳳山陰人祖謚康熙二十五年一鳳知縣事建名宦鄉賢祠東隅社學重修縣署北門隄百廢具舉又遍搜遺文廣詢故老成書為紀類三十邑之有志書自一鳳始

韓義會稽人乾隆五十九年知縣事築隄賑饑修學宮建書院諸大政次第倡舉尋擢潮州府

謝邦基浙江人嘉慶二十四年任縣篆獨殷殷於文教邑距省千餘里距京八千里士子赴鄉會試苦乏資邦基與紳士邱步瓊陳觀等多方籌畫創扶輪堂廣勸紳富捐輸置產作每科鄉會試川資而自捐金以為倡自是士皆得壯行色矣

金紳山陰人乾隆二十一年任海陽篆勤敏愛民捐資倡築江東秋溪東廂三都隄修磯圍遂臻完固二十六年督濬三利溪明

年復修南門涵(此一條應列在韓義條上)

文晟萍鄉人。道光時任海陽縣。以振興學校、表揚節義為務。並疏水利以濟農田、築隄防以捍潦漲等事。

謹案文晟嘗歷任東安、連平、清遠、番禺等縣。及嘉應州、潮州府。後死於髮賊奉

旨。照道員陣亡例優恤。准卹。城建立專祠。

第二節 去害

陳康年，晉江人。宋政和間，知縣事。值歲飢，民率逋負。康年捐俸代償。又出私穀賑之。民多所全活。擢潮州通判。會巨寇黎盛犯境，嚴

兵急擊賊，大挫遁。民得以安。

吳達，豐城人。明萬曆中，任海陽縣事。下車之初，歲多厲疫，而內供繁重，急摧科如逋亡。達一意賑恤，與民休息。時東隄潰，議修久不決。達以隄障三邑(海陽、澄海、揭陽)而勞擅一鄉，且比年尤加荒歉，民多失所。非以供使民之道，乃建議請帑金，毋派捐工役。所需受田與授田分半。當事從其議。隄由是以成。

張士連，安邑人。雍正三年，以進士知縣事。縣有豐政都，其地僻處萬山中，向有抗公拒捕等習。又有仲坑諸山，出產銀鉛，久為盜藪。士連嚴查保甲，慎選鄉約，俾互相稽察，積弊以厘，一方以淨。

吳均錢塘人道光二十四年由嘉應州知州調署海陽篆生平嫉惡最嚴地方匪類必擒治乃已奸宄熱服民愛之如父母時劇盜黃悟空結雙刀會聚黨數千蔓延三縣(海陽潮陽揭陽)均廉得其情首發奸狀請於監司捕治巡道李煒煜委任之卒擒悟空捕黨數百各縣藉以安謐

施紹文廣西人同治四年署邑篆時邑多盜歷任不能治雲步以下至白日截劫紹文初蒞任訪地方利害稔其事情憤然曰雲步距城咫尺若輩敢爾安用官為乃率勇往捕擒盜二人就地戮之四境帖然

第三節 聽訟

金謐明宏治間由舉人知縣事邑民陳姓以逐鳩雁大辟寃久莫白謐達監司釋其罪又簡重為奸婦殞命累年未決微服密訪獲其骨於枯井論婦如律一時稱為神君

王演疇鼓澤人明萬曆中由醴陵知縣調大埔以才調海陽到任後汰積弊清宿案禁圖賴省刑罰簡詞訟任逾二載吏習而民安之

余恩錄浙江舉人同治六年任縣篆民凡有告發令告堂立判其狀其須質對者亦即時傳集訊結民無冤抑案無滯留然日判訟

獄允幾案。猶時書聲達外署。外嘗曰：海陽缺人，怕煩我，獨嫌其簡。時有兵丁秦千，恃其母為現任某觀察乳媪，橫行街巷，強占鄰婦。莫敢問，恩鑠風聞其事，拘繫之。媪求某觀察提訊，開釋。恩鑠默遣差伺其出道，署轅外捉歸獄，而絕其飯，斃獄中。一時人心為之大快。

張念祖，桐城人，由拔貢籤分廣東知縣。光緒八年，署海陽縣篆，勸於民事，每聽訟常至三鼓，反覆辯駁，務得其實。

第三章 兵事錄

第一節 全在本境

王伯宣海陽賊首張連之黨僭號改元提督侍郎張果奏調兵討平之

謹案徵獻錄伯宣入海尊倭寇犯潮州牽我兵不得相救勢甚猖獗是伯宣亦當時劇盜也

郝尚久永明故將也殺車任重投誠權鎮潮州順治九年結寨金山越明年張鑑宴會勢甚橫三月總兵劉伯祿檄為參將不就遂叛自稱新泰伯奉故明永曆號四月攻潮陽縣不克閏八月靖南

王狀繼茂統官兵土兵十萬攻之尚久兵敗遂奔金山與子堯投井死

鄭元海陽社甲鄉人海寇黃海如黨也乘亂復煽自稱都督以邱孔異洪玉汝為謀主總兵劉伯祿平之

謹案張志作鄭元周志作鄭元平今從張志又案劉伯祿以十年至潮州周志繫於康熙十三年誤也

陳玉友桑浦山寇也糾眾破鄉寨與邱輝(潮陽人一名臭紅面)勢相犄角康熙七年十二月羣盜襲揭陽有術者謂玉友曰君貴相當鼎峙而王玉友喜自稱王者之師入城禁殺掠而擄掠如故縣

令龔元英懸賞格募斬玉友首者予千金兵壯人人奮勇當殺二百人餘遁去逐至海港溺死者三百人擒玉友斬之十人爭功裂其屍為十段縣令以千金予十人均分之

劉進忠潮州鎮總兵官也康熙十三年甲寅閩吳三桂叛於滇耿精忠叛於閩遂遣腹將楊希震趨福州納款精忠獻潮郡十一州地請假寧粵將軍印以號召軍民將遍召所轄十三營會於韓江以應之時續順公沈瑞駐潮陰為之備乘進忠父壽圖之同城巷戰瑞兵敗績四月耿逆頒將軍印抵潮進忠叩首受髮髮易服從明制文檄不用我

朝年號以生員蔡茂植為副將以程鄉令王仕雲為潮州府以經歷童士超為海陽令七月平南王尚可喜遣其子之孝率兵討進忠結營西南山阜時臺灣寇鄭經寇漳泉閩粵路梗進忠援絕乃納款於經許之聲勢頗振九月巡撫劉秉權帥師討進忠敗之於鳳凰洲官軍乘勝連克東津筆架山洗馬橋(皆本境地)三營自此官兵沿山築壘緣江列戍進忠孤城四面受敵計窮甚將乞降會鄭經援至遂無降意時劉秉權已卒於軍矣十二月尚之孝攻潮州城不克走普甯十四年乙卯二月之孝攻進忠於蠻母山(屬本境)失利又走普甯尋自揣不敵遁惠州進忠尾攻之不克入臺灣

謁經經不禮軍被奪十六年康親王大兵南下進忠勢窮乞降我
磔於市

謹案逆臣傳本傳載進忠窮蹙歸順上命宥進忠罪仍鎮潮
州隨大軍進勦尋疏辯謀叛事而陰通吳三桂召兵自効十
九年又以狀精忠為徐鴻弼發罪狀事涉進忠有與精忠謀
結為心腹即逮問得實同精忠磔於市則進忠當在十九年
乃磔於市志書繫於十六年誤也

吳忠恕海陽彩塘人因流民失業與游僧亮聚寶寺糾眾拜會咸
豐四年四月乘潮陽賊陳娘康作亂遂推牛饗眾樹旗倡亂進攻

海陽各鄉知縣劉鎮被困於龍湖城中戒嚴時豐順丁日昌募勇
駐韓山潮陽令汪政率勇駐西湖東西成犄角潮城乃恃以安七
月忠恕攻東橋頭汪政擊退之遂攻審埠通判賀桂齡馳兵往救
不克審埠遠近為賊脅應勢頗猖獗于是進攻楓溪等處并攻郡
城汪政又擊退之然楓溪附近各鄉已為賊有矣八月忠恕乃令
潮陽賊圍府城以糧餉不繼遂退意溪紳士鍾英才約官軍夾擊
之賊大敗十月吳忠恕李如珠和尚亮次第就擒伏誅餘黨亦悉
皆潰散焉

陳阿十海陽鶴塘人先是吳忠恕倡亂各屬賊匪俱為響應約期

攻城城中多遷避於鶴塘阿十見子女玉帛頓懷不軌先至澄海謁賊首王興順興順允與連結歸遂聚眾叛與忠恕合進距卧石岡洋潤溪(均屬本境)等鄉六月攻饒平隆眼城并攻澄海臨汀寨皆為官軍所敗七月攻東橋頭知府吳均遣潮陽令汪政擊退之未幾阿十暴死其兄阿四代統其眾及忠恕伏誅阿四乃護送王惠溥并縛賊數十投誠(以上皆本境叛黨者)宋紹興三年海寇黎盛犯潮城知縣陳康年擊退之明英宗天順四年海寇黃于一林烏鉄等作亂敗海陽官軍益肆劫掠所過無不殘害知府周瑄以奇計擒烏鉄等誅之

謹案于一等後復亂於潮陽周瑄討平之以無與海陽故不錄

海寇魏崇輝揭陽人也與羅劉甯黃阿山聲勢相倚招集無賴大肆劫掠海揭尤受其害天順七年僉事毛吉集兵勦平之赭其地明宏治十四年饒平人蘇孟凱與弟晚仔子隆聚眾山林以賣卜為名能以公平服人心由月間聚眾千餘人劫掠海陽村落民罹其害者數年知府葉元玉督兵破其巢殺孟凱晚仔隆三人餘黨潰散

邱泥金饒平人嘉靖元年作亂劫海陽通判周箕討平之